

Dumonda Rutishauser concernent il studi da bachelor da tgira en il Grischun

La garanzia d'in providiment da tgira d'alta qualitat è ina chausa centrala per il chantun Grischun. La mancanza da persunas spezialisadas, il svilup demografic e las pretensiuns creschentas pretendan da rinforzar la scolaziun da tgira sin tut ils stgalims e da la francar en las regiuns.

Sut quest aspect è vegnì persequità – en il rom da la realisaziun da l'Iniziativa da tgira – er en il chantun Grischun la concepziun d'in studi da bachelor da tgira (SAS). Oriundamain era previsa ina stretga cooperaziun tranter la Scola auta spezialisada dal Grischun (SASGR) ed il Center da furmaziun per la sanadad ed ils fatgs socials (CFSS) Cuira. Il CFSS è francà dapi onns sco instituziun chantunala fundamentala en la scolaziun da tgira sin il stgalim secundar II e terziar B ed è collià stretgmain cun la pratica. En quest connex ha el fatg lavurs preparatoricas concepziunalas e substanzialas durant plirs onns en vista ad in studi da bachelor da tgira.

Ussa è la SASGR sa decidida da collavurar cun la Scola auta turitgaia per ciencias applitgadas (ZHAW). Tenor il stadi actual duai la scolaziun teoretica avair lieu sco fin ussa per gronda part a Winterthur (chantun Turitg), entant che la SASGR surpiglia en emprima lingua ina rolla intermediaria tar l'organisaziun da plazzas da praticum en il chantun. Gia ussa pon studentas e students da las differentas scolas autas spezialisadas absolver praticums en instituziuns grischunas. Ina midada u schizunt ina meglieraziun na po betg vegnir constatada cun il nov partenadi.

Cun questa situaziun da partenza sa tschentan dumondas davart la responsabladad chantunala, il rinforzament dal Grischun sco lieu da furmaziun, l'integraziun persistenta da persunas spezialisadas sco er la rolla d'instituziuns da furmaziun chantunalas existentas.

Per pussibilitar in studi SAS da tgira ha il chantun fatg adattaziuns da leschas, uschia en la Lescha davart las scolas autas sco er en connex cun la finanziaziun da la scolaziun. Sut quest aspect sa tschenta la dumonda, sche las finamiras che vegnan persequitadas cun questas adattaziuns vegnan cuntanschidas cun il model da cooperaziun ch'è ussa vegnì tschernì.

1. È er la Regenza da l'avis, ch'i na vegn betg installada ina scolaziun academica independenta da tgira en il chantun Grischun cun il model da cooperaziun actual tranter la SASGR e la ZHAW, nua che la Scola auta spezialisada dal Grischun na surpiglia sezza betg ina funcziun da scolaziun complessiva?
2. Sin tge princips e tge directivas sa basa la Regenza per l'impundiziun dals meds finanzials chantunals, sche instituziuns da furmaziun chantunalas cun ina incarica da prestaziun respectiva na vegnan betg involvidas en cas da novas purschidas da studi?
3. Tge criteris èn decisivs per la Regenza, per che contribuziuns chantunalas per novas purschidas da studi garanteschian ch'il Grischun vegnia rinforzà a lunga vista sco lieu da furmaziun e da providiment?

Cuira, ils 23 d'avrigl 2026

Rutishauser, Beeli, von Ballmoos, Atanes, Bachmann, Bardill, Baselgia, Berther, Biert, Bischof, Bisculm Jörg, Cahenzli-Philipp, Coiro Schwarz, Collenberg, Danuser (Cuira), Degiacomi, Derungs (Domat), Dietrich, Ehrler, Furger, Gansner, Gartmann-Albin, Gianelli, Gredig, Hermle, Kreiliger, Mazzetta, Messmer-Blumer, Morf, Müller, Nicolay, Preisig, Schläpfer, Zaugg-Ettlin, Zindel